

Tutu é kuvi ūyi e táxnūu San Pablu iña ña ñuú Corintu

Taxnūu Pablu tú'un iña ña kuínti'xe i, ña ntoo ñuú Corintu

¹ Xu'u é Pablú u ne, pustrú u iña Jesúcristu, tsí kuān o e ntío Xuva kō. Ntuví u ení ko Timoteu táxnūu ntí tutú sa'á iña ña kuínti'xe i Xuva kō, ña ntánataká nuu ini ukun ñuú Corintu, ni un ntíí ntíí ña ntáduku ntée Xuva ko da kanií ñuú Acaya. ² Na naxnuu viko Xuva ko ntō. Na tā'xi ña é kuntōo vá'a nto, ñi ña ñi Tó'o ko Jesúcristu.

Nté ō ntó'o Pablu

³ Ká'an o ni Xuva ko, uvā Tó'o ko Jesúcristu, tsi dóo va'á ña. Tsí ñi ña é uva ko ña e dóo kantunta'ví ini ña kō, é kanatsu'un ka'nu ña iní kō é vī'a é uten. ⁴ Xuva kō ne, kanatsu'un ka'nu ña iní ko da nēé ka nuu i e ntánto'o kō vata koo é kúvi natsu'un ka'nu o iní ta'an ko, ña e ntánto'o i ñi, vata tsí ó de Xuva ko ni kō. ⁵ Tsí kuān te dóo ntánto'o ntí kuenta iña i e ntántikín nti Cristú ne, ntá tsi ñi ña ña dóo kanatsu'un ka'nu ña iní nti ñi. ⁶ Tē ntánto'o ntí ne, ntánto'o ntí vata koo é nāku'un ka'nu iní nto, vata koo é nākáku nto. É nátsu'un ka'nu Xuva kō iní nti vata koo é nátsu'un ka'nu ntí iní nto ñi vata koo é kutíi nto é nto'o nto vatā o ntánto'o nti. ⁷ Dōó ka'nu kuini nti ni ntō tsí iní nti tsí te kuān o ntánto'o nto vatā o ntánto'o ntí ne, kuan tsí ó kanatsu'un ka'nu Xuva ko iní ntó vatā tsí ó de ña ñi nti.

⁸ Ntio nti é kūtuni ntó, ta'an ko, nté ō ntó'o ntí ñuú Asia. Un vá'a tsi ntó'o nti íkān. Dókō sá ña ni kutíi nti. Tsí kúvī nti, kuini nti. ⁹ Ntá tsi kutuní nti tsí da mií é kúvī nti, vata koo é kūtuní nti tsí ña te mií nti iō nti é vīí nti, tsí Xuva kō é iō ña é vīí ña, tsí ñi ña é kanantōto ña ña xi'i. ¹⁰ É nakākú Xuva kō ntí ñi ña dá dokó sa ñi xi'í nti ne, kuān koo vīí xtukú ña. Iní nti tsí nakāku xtúku ña nti tē xeé doxi'i e dóo ntii ini í, ¹¹ te ñi ñi nto xntii ntō ntí é kā'an ntā'ví

nto kuenta iñá nti. Te tĩtĩn ña'a ka'an ntâ'ví ña iñá nti ne, tĩtĩn ña'a naku'e ña sintiá'vi nta'a Xuva kō tsi ni'í ko é vā'á nta'a ña.

Nté kui ña ni ñé'e Pablu ñuú Corintu

¹² Ió uun nuu i e dóo ka'nu kuini nti: tsi ñá te nēe kuetsi nti tsí ña ni idé nti nuu i é kīni kaa ñuxiví sa. Tsi dé ntaá nti é ká'án nti ni ntō é nuu é ntaā i. Tsi da xe dóo va'á Xuva kō né, xntii ñā nti é kuān o dé nti, tsí ña kúvi víi nti nuu i é vā'á tē dí ña Xuva kō kaxntíi ña nti. ¹³ Dā ntátaxnūu ntí tutú nta'a nto ne, ñá te tū'un e dóo xū'u ntáka'án nti ni ntō, tsi ntáñe'e dikí nto tú'ūn é ntáka'án nti. Ntio ko é na kī'in dikí vá'a nto, ¹⁴ vatā o kue'en dikí kúdií nto un siin e ntáka'án nti ni ntō, vata koo é ka'nu kuini ntó kuenta iñá nti ne, ka'nu kuini nti kuenta iña ntó di, tē xee ntúvi é nainu xtúku Tó'o ko Jēsuu.

¹⁵ Tsí iní u sá'ā ne, di'na mí ntoo nto kī'in u kíkoto ni'ni ú nto, kuíni kó, vata koo e dóo diní nto uvi íto é kōto ni'ni ú nto. ¹⁶ Tsi ntío ko é kuíta ntí'xin u mí ntoo nto te kuē'én u itsi ñuú Macedoniá ne, te kuíta ntí'xin xtúku ú da xkókoo ú, vata koo é xntii ntō kó te kuē'en xtúku ú itsi ñuú Judea. ¹⁷ ¿Ñā vá'a ntū ó ni dē kuení ko, te kuini nto? ¿Ntákuinti'xe ntu nto te dotō tsí kax'é ú xu'u ko é víi u, o tē ña víi u, vata tsí ó de ña é ña ntántikín Xúva kō? ¹⁸ Kutuni Xúva kō tsí nuu é ntaā i é káka'án nti ni ntō, ñá te dotō tsí kaka'án nti. ¹⁹ Ntuní nti Silvanu ni Timóteú ne, ntáka'an ntódo ntí ni nto iña Jesúcristu, I'xá Xuva kō. Divi ñā ne, kaka'an ña é nuu é ntaā i, ñá te dotō tsí kaka'an ña. ²⁰ Tsí divi ñā ne, dē ntaa ntí'i ña é un ntí'i e tá'xi Xúva kō xu'u ña. Dukuān ne, ntáka'an o “Kuan tsi koo na kōo” da ntáka'an o tsí dóo ka'nu Xuva kō. ²¹ Xuva kō ne, é tā'xi ña é kuve ta'an kūtu o Cristu. Mii ñā náaxnúu ña kō. ²² É xntēé na'a ñá ko vata koo é kūtuni ko tsi ntáduku ntée o ñā. Tsi tá'xi ña Espiritū Sántū san é kunūu ña nima ko vata kaa uun káa é ntēé na'a nima ko.

²³ Ntá tsi ña ni nákuíta ntí'xin ú ñuú Corintu vatā ó kaka'án u, tsí ña ni ntío ko é kuntōo ntá'xa nto kuenta iñá ko. Ini Xúva kō tsí nuu é ntaā i. ²⁴ Tsi ñá te ntí'i ntádē kú've

¹⁴ Ntá tsi ntadiá'vi Xuva kō tsí nguentúvi kata'xi ña é kūvi vií ntí, tsi kúvi dé Cristú ne, ntántikín ntí ña. Dā mí'i ka ntáñe'é ntí ne, ntaíní'i ntí tú'un iña ña vata koo é kūtuni ñá'a xoo ñá'a é ðivi ñā. Dukuān ó kaika tú'ūn iña ña dá kaniñ ñūxiví sa, vatā ó kaika ðiko i e dóo vá'a ñe'e. ¹⁵ Ntí'í ne, vata kaa ðíkō kutu é kaxé'e Cristu ntá'a Xuva kō ntáa ntí, uun ðíkō i é kaika mé'ñū ña ntánakáku san nī ña ntákunaá san. ¹⁶ Dā íni ña ntákunaá san ne, kutuni ña é nī'i ña dóxi'i. Dā íni ña ntánakáku sán ne, kutuni ña é nī'i ña ntuvi iña ña. ¿Xoó ntu kuvi vií i nuu i sá'a? Mii tsi Xuva ko tā'xi ña é kūvi vií ntí. ¹⁷ Ntí'í ne, ñá tē ntaíka ntí ntádikō ntí tú'un Xuva ko vatā ó de ña nguūi. Nā tē ntánadama ntí tú'un ñā, tsi ntáka'an ntaá ntí tú'un Xuva kō, ñá tē ntaéni nta'ví ntí ña'a. Tsí mii Xuva kō táxnūu ña ntí ne, é kūve ta'an ntí nī Cristu.

3

Tū'ún xee é naxtūví Xuva kō

¹ ¿Ō ntádē kuení ntu nto tē ntáka'an xtúku ntí ni ntō tsi dóo va'á ntí? ¿Ō ntio ntu nto é kuído ntí tutú sa xee ntí mí ntoo nto vata koo é kūtuni nto xoó ña'a ntí? ¿Ō kantio ntu é kākán ntí nto tutú sa, vatā ó de tuku ña'a? ² ¿Ñā'á ni san! tsí ðivi ntō e kúvi nto tutú san é nī'i ntí. Tsí ðivi ntō ne, vata kaa uun tutu é ntēé na'a nimá ntí é kīni un ntíí ntíí ña'a san, nakua'a ña. ³ Tsí ntó'ó ne, vata kaa uun tutu é de vá'a Cristu é nī'í ntí. Nā te tīnta ni xé'e, tsí Espíritu Xuva kō, ña kantíto ntii dañu ntūvi. Nā te āta xúu ni kanteé na'a, tsí nima ñá'a san é kānteé na'a.

⁴ Dōo ntaíntee ini ntí Xuva ko kuēnta iñá Cristu. ⁵ Tsí ña te míí xntí iní ntí nté koo vií ntí, tsí nee iña é ncho vií ntí ne, vé'xi nta'a Xuva kō. ⁶ ðivi ña nañē'e ñá ntí nté koo vií ntí tsiñu kuenta iña tú'ūn xee san e xtúvi ña. Tū'ún xee san ne, ñá te tū'un é ntēé na'a é kada ntaa o vatā ó lei Muísee, tsí ntuvi iña ko é vē'xí nta'a Espíritū Sántū. Tsi tú'ūn é ntēé na'á san ne, kaka'an tsí nī'i ko dóxi'í san tē ña

ni de ntáa o, ntá tsi Espíritū Sántū sán ne, kata'xi ña ntuvi vā'á ña ko.

⁷ Tū'un e xtúvi Xuva kō kídaā ne, áta xūu tsí kanteé na'a. Ntá tsi un tsi kaxi'í nuu ka'nu nuu Muísee da kí'i ña tú'un san. Ntē ña ni kutíi ña Israeé san koto ña nuu ña, tsi dóo kaxi'í nuu. Ntá tsi da kuíi da kuíi tsi kanta'va ntúve i san. Te kuān o xi'í nuu ka'nu da xée tú'un é ní'i kó doxi'í san ne, ⁸ ¿nté ntu kaa díi díi ka'nu tú'un e tá'xi Espíritū Sántū san? ⁹ Tē dóo ka'nu kúvi dá xee lei é ní'i kó doxi'í ne, díi díi ka ka'nu kuvi dá xee tú'un é kā'an Xúva kō tsi ntí'i kuétsi kō. ¹⁰ Lei e xtúvi ñá dí'na ne, dōó ka'nu, ntá tsi veví ne, ña ká'nū ka vata kaa tú'un xéé san. ¹¹ Tē dóo ka'nu kúvi da xtúvi ña lei é ña na'a ni idiá'vi ne, da díi díi ka ka'nu kuvi dá xee tú'un e ntíi dañu ntūvi kaidiá'vi.

¹² Nuú é ntaā i tsí iní ntí tsí kuān koo kuvi. Dukuān é ntáka'an ntaá ntí ni ntō. ¹³ Ñā ntáde ntí vatā o dé Muisee. Tsí Muiseé ne, dávi nuu ña nuu ña dóo san vata koo é ña kiní ña Israeé san tsí kanainu kudii é káxi'í nuu nuu ña. ¹⁴ Ña Israeé san ne, kúka'xi diki ña; ñá ntáñe'e diki ña. Kuan tsí ó ntee doó san nuu ña vata koo é ña kí'in diki ña da ntánakuā'a ña tú'un āta san e xtúvi Xuva ko ntā'a Muisee, tsí mii tsí Cristu kuvi víi ña naki'i ña doó san é nteé nuu ña vata koo é kí'in diki va'á ña. ¹⁵ Vata da e ntánakuā'a ña lei Muiseé san veví ne, vatā ó te kanteé doó san nuu ña vata koo é ña kí'in diki ña. ¹⁶ Ntá tsi tē xoó ña'a xkokoō ñá ne, nakuntíkin ña Tó'o kō ne, naki'i ña doó san é ntee nuu ña. ¹⁷ Uun tsi Xúva ko ni Espíritū Sántū sán ne, xoo ñá'a é nuu Espíritū Xúva kō nima ñá ne, ntaíka xaa ña. ¹⁸ Un ntíi ntíi o é ña katavi núu ka doó san nuu ko ne, nāxi'í nuu ko vata koo é kīni ó Xuva kō nté kaa ña e dóo va'á ña. Dukuān ne, ntánadama ntí utén uten é ntūvi ntí vata kaa Cristu, tsí utén uten kanata'xi ká ña kō e dóo va'á ña ña. Sá'ā é vē'xí nta'a Tó'o kō Espíritū Sántū san.

4

¹ Dukuān ne, ña ntánatívi iní ntí, tsi dóo vá'ā o dé Xuva kō da tá'xi ña tsiñu sá'a é víi ntí. ² Ntí'í ne, ñá víi ntí uun

nuu i é kini kaa vatā ó de ña é kade xū'u, é kau'vī ña é vīi ditó ña. Ñá tē ntaéni nta'ví nti ña'a; ña ntánadama nti tú'un Xuva kō. Tsi nti'í ne, ntáka'an ntáa nti ni ñā'a é nuu é ntaā i vata koo é kūtuni nti'í ña tsí da mii tsí é vā'a e ntáde nti. Ini Xúva kō tsí nuu é ntaā i e ntáde nti. ³ Tē kuiní ña'a te dóo xū'u ntáka'án nti tú'un va'á san ne, ntá tsi ña te un nti'í nti ña, tsí mii tsí ña ntákunaá san é ña ntátekú ña tú'un e ntáka'án nti. ⁴ Tsí divi ñā é ña ntákuinti'xe i Xuva kō ne, kūneé nuu ña. Tsi é ña vā'a san é kadē kú've ñuxiví sa ne, edí nuu nuu ña vata koo é ña kiní ña tsi dóo va'á tú'un va'á san iñá Cristu, ña e dóo va'a. Tsí te kini ñá Cristú ne, kiní ña nté kaa Xuva kō di. ⁵ Dā ntáka'an ntódo nti ne, ñá te kuēnta iña míi nti ntáka'an ntódo nti, tsí kuenta iña Jesú Cristu, tsí divi ñā e Tó'o ko ñā. Nti'í ne, kūdii ña ntáde tsiñu iña nto nti kuenta iña Jesús. ⁶ Mii tsi Xuva kō, ña é de kú've é xi'í nuu ñu'ú san mí nēé san ne, divi tsi ñā naxi'í nuu ña nimá nti vata koo é kuenta iña ñú'u san ne, kutuni ko tsi dóo kaxi'í nuu ka'nu Xuva ko te kiní ó Cristu.

¿Nté koo kuntoo o e ntákuinti'xe ko Xuva kō?

⁷ Ntá tsi nuu i e dóo nuu a'vi e tá'xi Xuva kō ne, nuu kúnū nti. Kúnū nti ne, vata kaa kídi é kudii nté'u kúvi, ntá tsi é nuu iní i ne, dōo nuu á'vi i vata koo é kini ñā'a tsí ña te míi nti kúvi víi nti, tsí Xuva kō é kúvi víi ña. ⁸ Kuān te titín nuu i ntánto'o nti ne, kūtíi nti. Kuān té ntánti'i iní nti nté koo víi nti, ntá tsi ió ka cho'o i nté koo víi nti, kuiní nti. ⁹ Kuān te dóo ntántukū nuu iní ña'a san nté koo víi ña nī nti, ntá tsi ña kaxtuví mii Xuva kó nti, tsí kainuu me'ñu kainuu dáva ña nti. Kuān te ntánantāva ña nti ñú'u kán, ntá tsi ña te ntáxi'í kue'én nti. ¹⁰ Dā mí'í ka ntáñe' é nti ne, ntafa ni'í nti doxi'í nti kuenta iña Jesús vata koo é kiní ña'a sán nti ne, kutuni ña tsí kantíto Jesús. ¹¹ Dá ió ka ntuvi iñá nti ne, utén utén ntántuvi kuenta nti nta'a doxi'í san kuenta iña Jesús vata koo é kiní ña'a tsí kantíto Jesús, tsi é nī'í nti ntuvi vā'á iñá nti kuenta iña ñá, kuān te xi'í kúnū nti. ¹² Dukuān ne, ntaxé'e nti kúnū nti dóxi'í san vata koo é nī'i nto ntuvi iña nto.

¹³ Ío mí ūve na'a tú'un é kaka'an ña é itúvi ntuvi dí'na, kaka'an ña: “Kuinti'xe kó ne, dukuān é kaka'an u”, ka'an ña. Ntí'í ne, dadíi kuinti'xe ntí ni ña tsikán ne, dukuān e ntáka'an ntí di. ¹⁴ Tsí iní ntí tsí Xuva kō ne, nantóto ña Tó'o ko Jēsuu dá xi'i ñá ne, kuan koo nantóto ña ntí di ne, dá nak'í'í ña kó ni ntō, é kuntoo dadíi o ni ñā. ¹⁵ Un ntí'í ntí'í é ita ntí'xin ntí ne, e kúvi kuenta iña nto. Tsí tē kútītín ña'a naxnuu viko Xuva ko ñā né, dōo kútītín ka ña'a naku'e ña sintiá'vi nta'a Xuva kō ne, ka'an ñá tsi dōo ka'nu Xuva kō.

¹⁶ Dukuān ne, ña ntánatívi iní ntí. Kuān té ntánatívi kúñū ntí, ntá tsi utén utén ntánaku'un vá'a nimá ntí. ¹⁷ Kuān té ntánto'o ntí veví ne, ntá tsi ñá tē nté sa ntí tū'un, tsí dá kuíta ntí'xin. Ntá tsi kani tú'un tsí ñá'í é nī'í ntí ntuvi vā'á kue'en iñá ntí nta'a Xuva kō é kutūví ntii dañu ntūvi. ¹⁸ Ntá tsi ña ntáde ntí kuenta nee e dīto, tsí nee e dītó san ne, ña te nguentúvi kaxntíi; nee é ña dītó san ne, ñá'í é kaxntíi ntii dañu ntūvi.

5

¹ Kūñú kō é ío ñuxiví sa ne, vata kaa uun vi'i mí kuntoo taan ō kaa. Tē ntí'í kúñū kō ne, ini o tsí ntoo vá'a vi'i vā'á ko iña Xuva ko e dukún kán, mí kuntoo o ntii dañu ntūvi. Tsí ña te ña'a ni de vá'a ña, tsí mii Xuva kō de vá'a ña. ² Dá ntōo ká o ñuxiví sa ne, ntáxkoo kani ō e dōo ntio ko é kuntoo o vi'i vā'á kō é ta'xi Xuva ko tē xeé o nta'a ña e dukún kán. ³ Nakū'un o vi'i vā'á san é kūtavi núu o vata kaa du'nu vata koo é ña kuntí'í nima ko te xi'i o. ⁴ Dá ntōo ká o nī kúñū kō ñuxiví sa ne, ntáxkoo kani ō tsi dōo ntántí'í iní kō. Ntá tsi ña te ntío kō é nakuíta o kúñū kō, tsí ntio ko kúñū xeé kō é nī'í ko nta'a Xúva kō. Ntio kō é nadama o ntūvi iña ko é kantí'í ntuvi iña ko é ña kantí'í ntii dañu ntūvi. ⁵ Xuva kō de kú'vē ñá ko kuēnta iña i sá'a: é ntio ñā é nī'í ko ntuví va'á iña kó ne, ñá'í ñā tá'xi ña Espíritu ñā vata koo é koo ntaá ini ko é nī'í ko.

⁶ Dukuān ne, ñá tē nguentuvi ntaíntée ini ntí, kuān té kuví ntí, tsí iní ntí tsi dá ntōo ká ntí ñuxiví sa ne, dōo ikā ntoo ntí mí tuví Xuva kō. ⁷ Ntá tsi ntaíka ntikín ntí Xuva

ko, kuān te ña ntaíní ntí ña. ⁸ Dukuān ne, ntaíntée ini ntí, kuān te na kuví ntí, tsi díí díí ka vá'ā ó te tsoo mii ntí kúñū ntí ne, dá ká'ín ntí nta'a Xuva kō, kíkuntóo dadíi ntí ni ñā. ⁹ Dukuān né, kuān te ntóo ká ntí nī kúñū ntí, kuān te tsoo mii ntí kúñū ntí ne, ntá tsi ntánti'i nuu iní ntí é víí ntí nee é ntio Xuva kō. ¹⁰ Tsí da mií é naxee o un ntíí ntíi o kuntāñi ó nuú Cristu vata koo é nī'i ko nee é dūku ntée o, te vā'á ne, o tē ña vá'a, vatā o de kúñū kō da intóo o ñuxiví sa.

Tū'un é ntuvá'a o ni Xuva kō

¹¹ Dukuān ne, da xé iní ntí tsi dóo donchu'ví ide Xuva kō ne, ntánti'i nuu iní ntí ntáka'án ntí ni ña'a te kuínti'xe ña ña. Ini Xúva kō nté ntaa ntí ne, ntio ntí é kūtuni ntó dí, te vā'á ntí ne, o tē ña vá'a ntí. ¹² Ñā ncho ka'an tūkū ntí ni ntō e dóo va'á ntí, ntá tsi ntio ntí é vā'á kuini nto kuenta iñá ntí vata koo é kuvi nantiko koō nto e ntáka'an ñá'a, ña e dóo ka'nu kuini i iña tuku ña'a te vā'a íto ña, ntá tsi ña ntáde ña kuenta te vā'á nima ñá ne, o tē ña vá'a. ¹³ Tē ntákulukú ntí, kuini nto ne, kuenta iña Xuva ko; te vā'á ntí ne, kuenta iña nto. ¹⁴ E dóo kuínima Cristú ntí ne, kade kú'vē ña ntuvi iñá ntí un tsi nte da kútuní ntí tsí mii ñā é xi'i ñá kuenta iña ko un ntíí ntíi o. ¹⁵ Vata tsi tē kuédadii xi'i o ni ña un ntíí ntíi o, vata koo é xo'ō é ntóo ká o ne, ñá víí ka o é ntáde kueni mii ko, tsí víi o nee é ntio Xuva kō, tsí divi ñā xi'i ñá naa ko ne, ntá tsi ntoto xtuku ña kuenta iña ko. ¹⁶ Vevii ne, ña ntaíní ka ntí ña'a nté ito ña vatā o dé ña'a ñuxiví sa. Kuān o íni ntí Cristu kídaa ñuxiví sa, ntá tsi ña kuán o kaíní ka ntí ña vevii. ¹⁷ Dukuān né, te xōo ñá'a é kuvi uun tsi ña nī Cristú ne, é tūku ñá'a ntuvi ña ve. É itā ntí'xin é átá san ne, é ntūxée nima ñá vevii.

¹⁸ Un ntíí ntíi nuu i sá'ā né, nta'a Xuva ko vē'xi, tsí divi ñā tá'xi ña é ntūvá'a ntí ni ña kuénta iñá Cristú ne, divi ñā tée tsiñu ña ntí é ká'án ntí ni ñá'a san é ntūvá'a ña ni Xuva kō. ¹⁹ Da xe é xi'í Cristu kuénta iña kó ne, xé'e Xuva kō é ntūvá'a ña'a ñuxiví sa ni ñā, é ña dá'vī ká ña ña kuétsi ñā. Tēe tsiñu ña ntí é kué'é ntí é kūtuni ñá'a san nté koo ntuvá'a ña ni ñā. ²⁰ Ntí'í ne, náá Cristu vé'xi ntí. Vata tsi te mii Xuva ko káka'an ña é ntáka'án ntí ni ñá'a kuenta iñá Cristú tē ntuvá'a ña ni Xuva kō. ²¹ Cristú ne, ña túvi

kuē'en tsi kuétsi ñā. Ntá tsi Xuva kō ne, dá'vi ña ña kuétsi ko ūn ntíí ntíi o dá xi'i ñá kuenta iña ko vata koo é ña kōó ka kuétsi kō ne, vii ō é vā'a é ntio Xuva kō.

6

¹ Ntí'i e ntáde tsiñu dadii ntí ni Xuva kō ne, ntaikán ntí nta'a nto tē ña te é ntaā i é nī'i ntó doméni e tá'xi Xuva ko ntō. ² Tsí Xuva ko kākā'an ña tú'ūn é ntēé na'á san:

Ura vā'a téku ko é kākā'an;

ntuvi dá nakáku ú o ne, xntíi ú o,

ka'an ña. Vevíi ne, ura vā'a; vevíi ne, ntuvi é nakakū ñá kō.

³ Ñá te kaedí nuu ntí itsi é kuntikin ñá'a Xuva kō, tsí ña ntío ntí é kā'an kīni ña'a san kuenta iña tsiñu e ntáde ntí iña Xuva ko. ⁴ Ñá'ā, tsí da nēé ka nuu i e ntáde ntí ne, ntáde ntí é vā'á vata koo é kūtuni ñá'a tsí nuu é ntaā i é kāde tsiñu ú iña Xuva ko da íni ña tsi ntákutíi ntí nimá ntí kuān te dóo ntánto'o ntí, kuān te ntákunáa nteé ntí, kuān te ió nuu i e dóo ntíi tu'un. ⁵ Tsi kutíi ntí nimá ntí da káni ña ntí xo'o ne, tsu'un kutu ñā ntí vi'i utun, dā náaká nuu ña é ncho víi ña du'xen nī ntí, dā un vā'a tsi ntíi dé tsiñu ntí. Ntē ña ni kidí ntí ne, intóo ntité ntí di. ⁶ Kūtuni ñá da íni ña tsí ña ini dé ntí é kīni kaa, tsí ini va'á ntí tú'un Xuva kō, tsi dóo ntákutíi ntí nimá ntí, tsi ntáde ntí é vā'á ni tā'an ntí, tsi é nuu Espíritū Sántū nimá ntí, tsí kaníi nimá ntí ntákuinima tá'an ntí, ⁷ tsi ntáka'án ntí tú'ūn é nuu é ntaā í, tsi tá'xi Xuva ko ntíi ntí é kūvi víi ntí. Da mii kuē'en tsi é vā'a e ntáde ntí da ntánāá ntí kuenta iña tú'un Xuva kō, da ntánada'ān ntí kúnū ntí di. ⁸ Un vé'xi ne, dōo ntáde ka'nu ña'a sán ntí; un vé'xi ne, ntánakuitā ñá ntí. Un vé'xi ne, vā'ā o ntáka'an ñá iñá ntí; un vé'xi ne, ntáka'an kīni ña. Un vé'xi ne, ntáka'an ña tsí ña veté ntí; ntá tsi nuu é ntaā i e ntáka'án ntí. ⁹ Un vé'xi ne, ntáka'an ña tsi ñá ini ñá ntí; ntá tsi ña te da díi ña'a ini va'á ña ntí. Un vé'xi ne, dókō sa ntáxi'í ntí; ntá tsi ntánakáku ntí, ntoo dukuān ntí, ntaíní nto ntí. Un vé'xi ne, ntáni'í ntí é ntō'o ntí; ntá tsi ña ntaé'ní kue'en ñá ntí. ¹⁰ Kuān te ntóo nta'xa ntí, ntá tsi nguentúvi tsi dóo diní ñu'u nimá ntí. Kuān te ntá'ví ntí,

ntá tsi dóo tītín ña'a ntáde kuika ntí ña. Kuān té ña tuví nee ió nti ne, ntá tsi é un ntí'i ió iná nti.

¹¹ Ntō'ó ta'an ntí, ña ñuú Corintú ne, e ntáka'án nti ni nto ntánī nimá nti. ¹² Ná te ntí'i é ña ntío ntí nto, tsí ñi ntō é ña ntío nto nti. ¹³ Kaka'án u ni nto vata kaa uva i'xa é kaka'an ñá ni i'xá ñá ne, víi nto da xe'e, kuinima ntó nti dadīi vata o ntákuinimá nti nto.

Xo'ó ne, vata kaa vi'i Xuva ko mí tuví ña ntáa ō

¹⁴ Ná ku kini nuu nto ni ñá'a, ña é ña ntákuinti'xe i Xuva kō, tsi ¿nté ntu koo kuntoo dadīi é vā'á san nī é ña vā'á san? ¿Vá kaxi'í ntu é nēé san mí ió ñu'ú san ñi? ¹⁵ ¿Nté ntu koo kudadīi Cristu ni tó'ō e ña vā'á san? ¿Nté ntu koo kudadīi ña kakuinti'xe i san nī ña é ña kákuinti'xe i? ¹⁶ Ña kúvi kuntōo santu e ntúvá'a nāa ini ukún Xuva kō. Xo'ó ne, vata kaa uun xúkūn mí tuví Xuva kō, ña kantítō san, ntáa ō. Tsí mii Xuva kō ne, kaka'an ña:

Tuví u ni ñā ne, kaika ú ni ñā;

xu'ú kuvi ú Xuva ñā ne,

ñi ña kúvi ña ña'a ko,

ka'an ña. ¹⁷ Dukuān ne, kaka'an xtúku Xuva ko ni kō:

Ntii ntō mé'ñū ña'a san, nakuntóo xio nto;

ñá ku tīn nta'a nto nēe é ña vā'a.

Kidāa ne, xu'ú nakuidó u nto.

¹⁸ Kuvi ú Uva ntō ne,

kuvi nto i'xá ko ñi,

ka'an Xúva kō, ña e dóo iō i é vīi.

7

¹ Ntō'ó ta'an ntí e dóo ntio ntí ne, sá'ā xe'é Xuva ko xū'u ña é vīi ña. Dukuān ne, ntada ntoo tsi mii ō kúñu ko ni nīma ko nee é kīni kaa. Kuiko ñu'u o Xuva kō, na ū'vi ko ña, tsi dóo ka'nu ña. Kada ntaa ntí'i ō nee é kaka'an ña.

Nadama ña ñuú Corintu nee e ntáde ña

² Naki'i nto nti ntánī nīma nto. Ná tē neé ni īde ntí ni ntō é kīni kaa. Ná ni nakunāá nti nto. Ná ni enī ntá'ví nti nto. ³ Ná te káde tīi ú ni ntō é kuetsí nto. Tsi é īni nto é kaka'án u ni nto dí'na tsí kudadīi nīma ko é dadīi kuntoo

ō, é dadii kuví ō. ⁴ Dōó ió ko é kā'án u ni ntō. Dōo vá'a kakuiní ko ni ntō. Dōó kanakunuu ka'nu iní ko kuenta iña nto. Kuān te dōo titín nuu i e ntánto'o ntí, ntá tsi díní kue'en túvi u.

⁵ Nté dā xeé ntí ñuú Macedonia ne, ñá ntaíntóo da'na ntí; ki'in itsí ntánto'o ntí mi ntáñe'é ntí: ntánaa ntée ña ntí ne, ntaú'ví ntí dī. ⁶ Ntá tsi Xuva kō ne, kanaxnuu ka'nu ña iní ña ntoo nta'xa san ne, divi ñā náxnuu ka'nu ña iní ntí dá xee Títo. ⁷ Dōo diní ntí tsí xee ña, ntá tsi díí díí ka diní ntí tsí kaka'an ña tsí divi ntō náxnuu ka'nu nto iní ña ne, kaka'an ñá tsi dōo ntio nto é kini ntó ko, e dōo ntoo nta'xa nto kuenta iña i é kāka'án u ni ntō, e dōo ntántí'i iní nto ko. Dā tékū ko sá'ā ne, díí ka nakunuu díní kue'én nimá ko.

⁸ Kuān te kúnta'xa iní nto kuenta iña tutu e táxnūu ú ne, ñá kánativi iní ka ko é taxnūu ú, kuān te nátivi iní ko dí'na dá kūtuní ko tsi kúnta'xa iní nto kuenta iña i; ntá tsi ña na'a tsí. ⁹ Veví ne, dōo diní ko kuenta iña nto. Nā tē dīnī ko é kúnta'xa iní nto, ntá tsi dīnī ko tsí idiá'vi é kúnta'xa iní nto, tsi kídāā nakuíta nto é kīni kaa san. Kúnta'xa iní nto vatā ó ntio Xuva ko ne, dukuān ñá tē nee é kini kaa ni ide ntí ni ntō. ¹⁰ Tsí te kúnta'xa iní ko vatā ó ntio Xuva kō ne, nativi iní ko kuetsí kō; kídāā ne, nani'i ko ntuví va'á iña ko. Kídāā ne, ñá kúnta'xa iní ka kō, tsi e nání'i ko ntuvi iña ko. Ntá tsi te kúnta'xa iní ko vatā ó de ña'a ñuxiví sa ne, ñá ntūvá'a ō, tsí kuvi o dóntíni. ¹¹ ¡Kiní nto ve nté ō kúvi da intóo nta'xa nto vatā o ntio Xuva kō! tsi dōo dé kuení nto ne, dōo xió ntii nto é nada'an mii nto kúñu ntō dī. Dōó dutsi kuíni nto é kāka'án u ni ntō ne, ú'vī ntó dī. Dōó ntio nto é kinī túku nto kó ne, ntánīñ nima nto é ntio nto é vii nto é vā'a, tsí xe'é nto é ntō'o ña é ede é kīni kaa san. Un ntíí ntíí dé nto vata koo é kūtuni ñá'a tsí ña tuví nee kuetsí nto nuu i sá'a. ¹² Dukuān né, dā táxnūu dí'na ú tutú san ne, ñá te kuēnta iña ña é ede é kīni kaa sán, ntē ña te kuēnta iña ña e ntó'o i, tsí kuenta iña ntó, vata koo é kūtuni ntó nuu Xuva ko tsi ntánīñ nima nto ntántí'i iní nto ntí. ¹³ Dukuān né, dōó ka'nu kuiní ntí.

Dā díí díí ka nakú'un ka'nu iní ntí da iní ntí e dōo diní tuví Títo kuenta iña nto. Tsí un ntíí ntíí nto nátsu'un ka'nu

nto iní ña vata koo é ña kutsú'un ká ña kuenta iña nto. ¹⁴ Kidáā ne, é kāka'án u nī Tito e dóo vá'á ña'a nto, kuiní ko. Tsí nuu é ntaā i é un nti'í é kāka'án nti ni ntō ne, kuan tsi ō é nuu é ntaā í vatā ó kaka'án nti nī Titó san di. ¹⁵ Tsí dā dií dií ka ntío ña nto dá kanaka'an ña nté ō dé nto e dóo dé ntaa nto é kāka'an ñá ni ntō, e dóo vá'ā o náki'i nto ña, e dóo ntaíko ñu'u nto ñā. ¹⁶ ;Dōo diní ko ni ntō tsí ini vá'a ú tsi ntáde ntaa nti'i nto nēe é kāka'án u ni ntō!

8

Kué'e diu'un táxnū ña doméni

¹ Kuan vī'a vé, ntō'ó ta'an ntí, ntio nti é kūtuni nto nté sa vá'ā o dé Xuva ko nī ña kuínti'xe i, ña ntánataká nuu ini ukún ñuú Macedonia. ² Tsí kuān te dóo ka'nu nuu i é ntánto'o ña ne, ntá tsi dóo diní ntoo ña; kuān te dóo nta'vi kue'en ña, ntá tsi dóo kue'e é xe'é ña doméni, vata tsi tē dóo iō iña ña. ³ Xu'ú kantada ntaa u. Iní u tsí xe'é ña vata kaa é iō iña ñá ne, dií ka kue'e é xe'é ña di, tsí mii ña ntío ña é kué'é ña. ⁴ Dōo ikan ñá da xe'e te kué'e nti itsi é xntii ña ta'an kō ña ntáduku ntée Xuva kō di. ⁵ Ne, dií ka kue'é edé ña vata kaa e ntantétu nti, tsí ña te da mii tsi é xe'é ña iña ña, tsí di'na ntáda ñā kuenta kúñu ña nta'a Xuva kō ne, da ntáda ña kuenta ntá'a nti di, vatā ó ntio Xuva kō. ⁶ Dukuān ne, ntaíkan nti da xe'e ntá'a Tito te nainú kava nto ni ña tsiñu vā'a e xtúvī ñá di'na, natakā ñá nee e ntío nto kué'e nto. ⁷ Divi ntō né, dōo vá'ā ó ntáde nto é un nti'í e ntáde nto; tsi dóo vá'ā ó ntákuinti'xe nto; dóo vá'ā ó ntáka'an nto; dōo ini nto; dōo ntánti'i iní nto é vii ntó nēe e ntío Xuva ko ne, dōo ntákuinima ntó nti vatā o nañé'e nti nto. Dukuān ne, ntio nti é koo ntií ntō é vá'á koo vii nto tsiñu sá'á di, e ntánī nima nto kué'e nto iña nto.

⁸ Ná te kataxnū u ntō é ká'án u ni ntō nté koo vií nto; mii tsi é ntio ko é kiní nto é vá'a e ntáde ña nguí san vata koo é kūtuni ntó tē nuu é ntaā i e ntánī nima ntó ntákuinima nto. ⁹ Ini ntó tsi Tó'o ko Jesucristú ne, dōo vá'ā o dé ña ni kō; dōo kade ña da xe'e. Divi ñā né, dōo iō iña ñá e dukún kán, ntá tsi tsóo mii nti'í ña iña ña, e

ntúnta'vī ñá kuenta iña nto, vata koo é ðivi ntō ne, nani'i nto e dóo nuu á'vi i kuenta iña ña.

¹⁰ Ntá tsi é vā'á mii nto te kuīnti'xe nto itsi ko é kākā'án u ni nto kuēnta iña núu i sá'a: Vá'ā ó te nainú kava nto tsiñu sā'á e dóo vā'ā o éni ntu'u ntō nte kuia ntí'i ko kán; tsí ði'na nto éni ntu'u ntō; ði'na nto ntío nto é vii nto. ¹¹ Vī'a ve ne, kue'ēn ntó dā nté koo é nantí'i nto; ntánī nima ntó víi nto vata tsí o éni ntu'u ntō nte nuu i kan, kué'e ntō nee é iō iña nto. ¹² Tsí te ūun ña'a ntio ña é kué'ē nti'xe ña domēni nta'a Xúva kō ne, kanaki'i ña da nēē ka é iō iña ña. ðivi ña ne, ñá kaikan ñá nēē é ña tuvi iña ko.

¹³ Ñá te kakā'án u te mii ntō tanúu nto vata koo é tuku ña'a kuntoo vā'a ña. ¹⁴ Tsí kaka'án u tsí ðíi ka vā'ā ó te kudadii nto ni ña. Vevii é ntekú ka iō iña ntó ne, xntii nto ña tē ntátaan núu ña; ðivi ñā né, xntii ña ntō da ntátaan núu nto ði. Kidáā né, kudadii nto ni ña, ¹⁵ vatā ó kaka'an tú'ūn é ūve na'á san: “Xoó ña'a é kué'ē natāká ña ne, ñá ni ntóo ka iña ña; xoó ña'a é ña kué'e ni nataká ne, ñá ni kúnáa ntēē iña ña”, ka'an.

Tito ni ta'an ña

¹⁶ Ntadiá'vi Xuva kō, tsí xe'é ña é kuan tsí ó kuvi nima Títo é kanti'i iní ña vata tsí ó kanti'i iní ko kuenta iña nto. ¹⁷ Dōo xkúntee iní ña dá tsixe'e ntí ña tē ncho kí'in ña, tsí mii ñā dóo ntio ña é kí'in ña mí ntoo nto.

¹⁸ Taxnúu ntí uun ta'an ko nī Tito é dāðii kí'in ñá ni ñā, uun ña'a e dóo vā'a ntáka'an ñá ñu'u ini ukún san iña ña, tsi dóo vā'ā ó kaka'an ña tú'ūn va'á iña Xuva ko. ¹⁹ Ñá te da mii tsi sá'a, tsí ña ñu'u ini ukún san nakaxnúu ña ña é kākā dadii ntí ni ñā é xntii ñā ntí é kuído ntí nēē e kintído ntí iña ña ntátaan núu i san, vata koo é ká'an ña'a san tsí dóo ka'nu Xuva kō, vata koo é kūtuni ña tsi dóo ntio ko é xntii ta'an ō. ²⁰ Kí'in dāðii ntí ni ñā, tsí ña ntío ntí é ká'an kíni ña'a kuenta iñá ntí tsí kué'e e kintído nti. ²¹ Dōo ntánti'i iní ntí é víi ntí nēē é vā'á kuenta iña Xuva ko ni ña'á san.

²² Uun ká tuku ta'an kō táxnūu ntí ña é kí'in dāðii ña. É kí'in ito iní ntí tsí kade ntaa ña é un ntí'í. Vevii ne, ðíi ðíi ka ncho víi ña tsiñu sá'a, tsí kanuu iní ña tsi ntáde ntaa nto é un ntí'í ði. ²³ Tē xoó ña'a tsixe'e ña nēē ñá'a Titó

ne, ká'an nto tsí ta'an ko ñā, tsí dadii ntáde tsiñu ntí ni ña kuēnta iña nto. Te katsixe'e ña tā'an ko ña nguií san ne, ká'an ntō tsí ña ñu'u ini ukún san táxnūu ña ña, tsí divi ñā né, dōo ntaíko ñu'u ñā Cristu. ²⁴ Dukuān né, nañe'ē ntó ña tsí nuu é ntaā i e ntákuinima ntó ña; nañe'ē ntó ña tsí nuu é ntaā i é vā'á ña'a nto, vatā o ntáka'án ntí ni ñā, vata koo é kūtuni ntíí ntíí ña'a, ña ñu'u ini ukún san.

9

É xntii o ta'an kō

¹ Ntá tsi ña kantío nto é ká'an túku ú ni nto kuēnta iña i é xntii ta'an ō, ña ntántikin Xúva kō, ² tsi é iní u tsi dóo ntío nto é xntii nto tā'an nto. Dōó ka'nu kuíní ko é kāká'án u ni ña ntoo da kanií ñuú Macedonia tsí divi ntō, ña ñuú Acayá ne, é iō tu've nto nte kuia ntí'i ko kán é xntii ta'an ntō. Tíín ña ntio ña é kuān koo víí ña di, tsi iní ña tsi dóo diní nto e ntáde nto. ³ Taxnūu ú ta'an kō san ve, vata koo é nāni'i é ntaā i é kāká'án u iña nto kuenta iña núu i sá'a, te ntaā i é iō tu've nto, vatā ó kaka'án u ni ñā. ⁴ Tsí te kūnteká u ña ñuú Macedonia, kí'in ni'i ú ña mí ntoo ntō ne, te vata tsoo tú've nto doméní san ne, dōó kuka'an nuú ntí e ntáka'an vétē ntí ni ña kuēnta iña nto ne, divi ntō né, dōó kuka'an nuu ntó di. ⁵ Dukuān ne, kantio é kākán u nta'a ta'an kō sán te di'na ña kí'in ña, kíkoto ní'ni ña nto te xntii ñā nto é tsōo tú've nto doméní san vata ō xe'é nto xu'u nto dí'na. Kidáā ne, é iō tu've doméní san tē xeé ntí, vata koo é ña te dava ó ini nto, tsí mii ntō e dóo diní nto é kué'é nto.

⁶ Sá'a nanū'u ntó iní nto: Xoo é ñā kue'e kaí'xi i ne, ñā kué'e kánani'í i di; xoo é kué'e kaí'xi i ne, kué'e kánani'í i. ⁷ É un é un nto ne, kué'e nto nēe e ntádē kuení nima nto é kué'é nto; ñā te kuētsi é kue'é nto, tsí Xuva ko kakuinima ña xoo é kaxé'e i é dodíni i. ⁸ Xuva kō né, kuvi ta'xi ña é un ntí'i nēe é vā'a é ntio nto, vata koo é nguentúvi xee tá'an é un ntí'i iña nto, vata koo é xkōó ka iña nto é vii ntó da nēe ka tsiñu vā'a. ⁹ Tú'ūn é ūve na'a sán ne, du'vā ó kaka'an: Dōo kue'e tsí'i ña nta'a ña ntā'ví san; tsiñu vā'a é edé ña ne, tuví ntii dañu ntūvi,

ka'an. ¹⁰ Mii Xuva kō é kāta'xi ña tsíkīn i é kū'xí ō é kūvi é kā'xi ó ne, divi ña tā'xi ña é un ntí'í e ntántio nto é kū'xi nto. Mii ña ntio ña é kuē'nu dí vata koo é kuē'e ní'i kuenta iña tsiñú va'a é edé nto. ¹¹ Divi ntō ne, un ntíí ntíí koo iña nto ve, vata koo é kuē'e tsi'i nto é kintído ntí. Kidáa né, dōó titín ña'a naku'e ña sintiá'vi nta'a Xuva ko kuēnta iña nto. ¹² Tsi dá kaxntii nto tā'an nto, ña ntántikin Xúva kō ne, ná te da mii tsi é xntii nto ñā e ntátaan núu ña, tsí naku'e ña sintiá'vi nta'a Xuva ko kuēnta iña i e xntii nto ñā. ¹³ É kuān ó ntáxntii nto ñā ne, ká'an ña tsi dóo ka'nu Xuva kō, tsí kutuni ña tsí nuu é ntaā i é ntaíko ñu'u nto tú'un va'á iña Cristu, tsi ñá ni de víni nto iña nto é xe'é nto ña ni ūn ntíí ntíí ña nguii sán di. ¹⁴ Divi ñā ne, ka'an ntá'vī ñá iña ntó dí e dóo ntio ña nto, tsi dóo vá'ā o dé Xuva ko ni ntō e tá'xi ña é víi nto é vá'á ni ñā. ¹⁵ ;Ntadiá'vi Xuva kō tsi tá'xi ña uun doméni e dóo va'á kue'en, é ntē ña kuvi ká'an ō nté kaa díí díí é vā'a!

10

É kadē kú've Pablu, tsí pustru ña

¹ Xu'u é Pablu ú ne, ká'ān ú ni nto kuēnta iña Cristú, divi ñā e dóo kakuinima ñá kō, e dóo vá'ā ó de ña ni kō. Xu'ú ne, tē dóo ntá'ví u dá itúvi ú ni ntō, kuiní nto, ntá tsi dá tuvi iká u ne, ñá kaū'ví ko é ká'ān u ni ntō. ² Ká'ān ú ni nto tē ña tsi'i ñú'ū ntó ko é víi ka'nu ú ni nto, iō ntó, tē náxeé u mí ntoo nto. Tē ña'á ne, kuān koo víi u ni da xōó ka ña'a iña nto e ntáka'an ña tsi ntáde ntí vatā ó ntio kúnū ntí. ³ Kuān te ntáde ntí du'xen é ntoo ká ntí nī kúnū ntí ñuxiví sa ne, ntá tsi ña ntanáā ntí vatā o ntánāā ña ntoo ñuxiví sa. ⁴ Tsí nuu i e ntánāa núu ni'i ntí san ne, ná te iñá ñuxiví sa, tsí nta'a Xuva ko vē'xi. Tsí Xuva kō né, dōó ntii iní ña é nantí'í ñá da nēé ka nuu i é kīni kaa, e dóo ka'nu. ⁵ Da nēé ka e ntádē kuení mii ñā'a san é ña te nuu é ntaā í ne, da nēé ka nuu i é ká'nu ncho víi, é kaēdí nuu itsi i é kīnī ña'a san Xuva kō; da nēé ka e ntádē kuení ña'a sán ne, ntántada ntí kuenta ntá'a Cristu vata koo é na kuínti'xe ña ña. ⁶ É iō tu've ntí é kuē'é ntí é nto'o da xōó ka ña'a, ña é

ña kákuinti'xe i é kāka'án Cristu, te xee ntúvi é uun ito tsi kuinti'xe vá'a nto.

⁷ Da mii tsí e ntaíto nto ña'a san nté ito ña. Tē xoó ña'a kaintée ini ña é kāduku ntée ña Cristú ne, na vii ñá kuenta tsí ntí'í ne, ntáduku ntée ntí Cristú di. ⁸ Kuān te ntéku kudii é kāka'án u kuenta iña tsiñú ntí ne, ntá tsi ña kakuka'an nuú ko, tsí Xuva kō tá'xi ña tsiñu ntí é xntíi ntí nto vata koo é kuē'nu vá'a nto; ñá tē ntánakō'xó ntéé ntí nto. ⁹ Ñá te kataxnūu ú tutú san é ncho nau'ví u nto. ¹⁰ Ntáka'an ñá'a tsi dóo ntii kaka'án u dá kataxnūu ú tutú san nta'a nto, ntá tsi da xe dóo ntā'ví ito u dá tuví dadii ú ni ntō, e dóo ntā'ví tú'ūn ko, ntáka'an ña. ¹¹ Ntio ko é kūtuni ñá tsikan, tsí ñi tsi é kāka'án ntí ni ñā da de vá'a ntí tutú san da intóo ikā ntí ne, ñi tsi vii ntí di te nākuntóo dadii ntí ni ntō.

¹² Ñá ntio ntí é kā'an ntí vatā o ntáka'an túku ña'a é ntánakate ntoo mii ñā kúñu ñā. Ná tē ntádē ntí kuenta te vii ntí vatā ó ntáde ña. Tsí ñi ñā ne, ntáde tuntu ña é ntáki'i kú've mí tsi ñā, é ntánantii ni'ni ta'an ña. ¹³ Ntá tsi ntí'í ne, ñá vii ka'nu ntí nee iña é ña káduku ntée ntí, tsí mii Xuva ko kāka'an ña mí xee tá'an tsiñu e ntáde ntí ne, ñi ñā tá'xi ña itsi é xēé ntí un tsi nte mí ntoo nto. ¹⁴ Ñá tē ntaíta ntí'xin ntí mi é ntio Xuva ko é xēé ntí, tsí Xuva ko kāka'an ña é xēé ntí mí ntoo nto. Tsí di'na ntí xēé ntí ñuú nto kán é xēé ní'i ntí tú'ūn va'á iña Cristu. ¹⁵ Ñá tē ntáde ka'nu ntí ntáka'án ntí kuenta iña tsiñu é edé tuku ñá'a é vata te ntí'í edé ntí. Ntá tsi é ntio ntí é dií ka vá'a koo kuinti'xe nto, vata koo é dií ka kue'e kada tsiñu ntí ni ntō, vata tsí ó kaka'an Xúva kō é vii ntí. ¹⁶ Kidáa ne, kuvi ká'ín ka ntí ñuu é dií ka ikā é ñuū ntó, kika'an ntódo ká ntí tú'ūn va'á san. Ntá tsi ñá ncho náki'i núu ntí tsiñu é edé tuku ñá'a, vata koo é ña ká'an ñá'a tsi dóo ka'nu ña'a ntí, vata te ntí'í éni ntu'ū ntí ntáde tsiñu ntí ikān.

¹⁷ Tē xoó ncho kada ka'nu i ne, na kadā ka'nu ña kuenta iña Xuva ko. ¹⁸ Tsí ña e dóo va'á ntí'xe ne, ña te míi ña kakā'an ña e dóo va'á ña, tsí Xuva ko kāka'an ña e dóo va'á ña.

11

Pablú ni ñā'a, ña é ña té pustru nti'xe

¹ Tē dí kūtíi nto nima nto ní ko te kā'án u vata kaa uun ña tuntu. Na kūtíi nto nima nto ní ko. ² Tsi dóo kakukuiñú ko nto, ñi divi dokuñú é vē'xí nta'a Xuva kō, tsi é xe'é u xu'u ko é ntāda ú nto kuenta ntá'a Cristú ne, é kūvi nto vata kaa uun ñadi'i kuétsi, ña e dóo va'á, ña é vāta kiní ñatíi. ³ Ntá tsi kadē kuení ko te kuān koo vií ña'a kani nta'ví ña nto vatā o dé koó san e kúvi dé ti éni ntā'ví ti Eva e dóo ki'in iní ti nté koo ka'an ti. Kidāā né, xtuví mii nto e ntáníi nima nto e ntákuinima ntó Cristu, é da mii tsi ñā é kuinima ntó ña. ⁴ Tsi nto'ó ne, dōo va'a ntácutíi nto nima ntó te da xōo ka ña'a xee ña e dóo kadaka nchu'ūn é kāka'an ña iña Jéssuu. Kuān té ña te kaká'an ña vatā ó ntáka'án nti ne, ntá tsi dóo diní nto ntánaki'i nto tuku espíritú é ñā te ñi Espíritu Xuva kō é nuu nima nto dí'na. Dōo va'a ntaíni nto tuku nchu'un e dóo kadaka, é ñā te ñi tú'ūn va'á iña Xuva ko e kí'i nto dí'na. ⁵ Xu'ú ne, ñá te dutsí ká u é ña tsíkan, ña e ntáka'an é ñi ñā é pustru, ña e dóo ka'nu. ⁶ Kuān té ña kakuvi kaka'an vá'a ú ne, ntá tsi ini vá'a ú iña Xuva ko. É ñi nto sá'a, tsi dóo ntánañé'é nti nto da nēé ka nuu i é edé nti.

⁷ ¿Ó dóo ntu kini kaa dé u é ña ni kí'i u xá'vī ko dá naku'a ú nto tú'ūn va'á san iña Xuva ko, é ntunta'vi mí u dá kāda ka'nu ú nto? ⁸ Tsí kaido ú diu'un iña ñá ñu'u ini ukún xio ñuu é vata kaa te xā'ví ko vata koo é ñi ntō ña ntá'vi nto ko é xntíi ú nto. ⁹ Dā itúvī ú ni ntō ne, dōo táan nuu ko, ntá tsi nté uun nto ña ni ngunúú ú nto te xntíi ntō ko é kátaan núu ko, tsí ta'an ko ña vé'xi ñuu Macedonía ne, xntíi ñā kó nēé é kátaan núu ko. Dukuān né, dōo dé u kuenta vata koo é ña natekú du'xén u ntō ne, kuān tsi koo vií u nguentúvi. ¹⁰ Nuú é ntaā í vatā ó kaka'án u, tsí kantíkin u Cristu. Kutuni Xúva kō tsi nté uun ña'a ña kuvi nakadí ña xu'u ko é kā'án u tsí ña ni kí'i u diú'un ntō da xntíi ú nto ne, kuān tsi koo ka'án u ni ña ntoo kaniñ nuú Acayá di. ¹¹ ¿Nté kui kuān ó kaka'án u? ¿Ó ña ntío ntu kó nto? Ntá tsi Xuva kō ini ña tsi dóo ntio kó nto.

¹² Kuān tsi koo vií ka ú vatā o dé u, é ña kí'í ú xa'vī ko é edé tsiñu u, vata koo é ña kué'e u é vií ka'nu ña e ntáde tsiñu vatā o ntáde tsiñu nti. ¹³ Tsí ña kuān ó ntáde sán ne, ñá tē dívi ñá é pustru é nuu é ntaā í ña, tsí da ti tsi ntaéni nta'ví ña ña'a e ntáka'an ña é pustrú Cristu ña. ¹⁴ Ña túvī nee iña é da kudu'va kō, tsí mii tsí tó'ō e ña vá'ā sán ne, kaeni nta'ví ña'a é kānadama kúñu ī é ntūvi vata kaa ánjē va'a. ¹⁵ Dukuān ne, ñá tē neé ka'nu nuu i te ña ntáde tsiñu iña i ntánadama ña kúñu ñá é ntūvi ña vata ntáa ña ntáde tsiñu iña Xuva ko, ña e dóo va'a. Ntá tsi uun ntuvi ni'í ña é nto'o ña nta'a Xuva kō é kuān ó ntáde ña.

Da ntó'o Pablu da dé ña pustru

¹⁶ Uun ito ká tuku ka'án u ni nto tē nté uun nto ña kadá kuení nto te kākulukú u. Te kuān o ntádē kuení nto ne, ntá tsi kiní nto nēe e ká'an ña lukú sa ni ntō, ña é kāka'an míi, ña é kade ka'nu miī. ¹⁷ É kuān ó kaka'án u ne, ñá te kakā'án u vatā ó ntio Xuva kō, tsí kaka'án u vatā ó kaka'an ña lúku, ña é kadē kuení i é ncho vií ka'nu. ¹⁸ Da xe dóo iō ñá ncho kada ka'nu ñuxiví sa ne, xu'ú ne, kuān koo kada ka'nú u di. ¹⁹ Tsí nto'o e dóo ini ntó ne, dōo vá'ā ó ntádē kuení nto nī ña lukú san. ²⁰ Ntō'ó ne, dōo vá'ā ó ntádē kuení nto ni tūku ñá'a, kuān te kátee tsiñu kuétsi ña nto, kuān te kánantī'í ña nto, kuān te katín ña ntō é vií nto é ká'an ñá, kuān te dóo ka'nu ncho vií ña ni ntō, kuān te kaxe'é nuu ña vinuu nto. ²¹ Xu'ú ne, kakuka'an nuú ko é ká'án u e ña kákene iní nti é kuān koo vií nti ni ntō.

Ntá tsi da nēé ka nuu i é ña kaú'vī ña é ká'an ña e dóo va'á iña ñá ne, xu'ú di ne, ñá kaū'ví ko é kuān koo ka'án u vatā ó kaka'an ña lukú sa. ²² Ña tsikán, ¿hebreu ntú ña? Kuān xu'ú di, tsí ña hebreu ú di. ¿Tātá Israee ntú ña? Xu'ú di. ¿I'xá Abraan ntú ña? Dívi ú di. ²³ ¿Ña kade tsiñu iña Cristu ntú ña? Xu'ú ne, díí díí ka dívi u é dívi ña, kuān te vata ó kaka'an ñá luku ú nee é kāka'án u. Ntá tsi díí díí ka éde tsiñu u é ña tsikan. Díí díí ka ki'in itō inúu kutú ú vi'í utun. Díí díí ka ki'in itō é'ni ña ko é ña tsikán ne, e dóo ki'in itō é dokó sa kaxi'í u di. ²⁴ Ú'un ito é'ni ña Israeé

san ko. Kāni ña kó xo'o. Oko xe'un kīmi é uun ito xé'e ña ko. ²⁵ Úni ito káni ña kó utun. Uun ito ká tuku ne, xuu káni ña ko. Úni ito nántatsin tun ntōo é kaxkani'i u nú ntute ñu'u kán. Uun ntuvi, uun niñu inúu nto'o u mé'ñu ntute ñu'u san. ²⁶ E dóo ki'in itō ñé'e ú ne, é dōo ínī u tsi dóo donchu'vi nú ntute ka'nu sán ne, dōo donchu'ví nī ña du'ú di; dōo donchu'ví nī ña ñuú ko é ncho ka'ní ña kó, nī ña tuku ñuú san di. Iní u e dóo donchu'ví ñuú ka'nu san nī má kū'ú san, ni ntute ñu'ū sán di ne, dōo donchu'ví ni tā'an ko, ña é ña te nuu é ntaā i e ntákuinti'xe i Xuva kō. ²⁷ Dōo ntó'o ko é dé tsiñu ú ne, dōo ki'in itō ña ni kídí ú ne, dōo ntó'o ko e dóo kákin kó ne, dōo itsí ko ntute di. Un vé'xi ne, ítúví ntité u ne, dōo ntó'o ko é ví'xin é ña tuvi dú'nú ko.

²⁸ Uun ká tuku nuu i sá'a ne: utén uten dóo kaexnúu kó e dóo kanti'i iní ko un ntíí ntíí ña ñu'u ini ukún san. ²⁹ Tē xoó ña tuvi ntíi i ne, vata tsí ó kanto'o kó di. Tē xoó kakó'xo i uun nuu i ne, xu'ú e dóo u'vi kakúvi kó kuenta iña i. ³⁰ Te kántio é kada ka'nu ú ne, kada ka'nu ú kuenta iña i é ña ni kuvi víi u é ña tuvi ntíi ko. ³¹ Xuva kō, ña é Uva Tó'o ko Jesūcristu, ña é kā'an o tsi dóo va'á ña ntii dañu ntūvi ne, ña ña ña iní ña tsí nuu é ntaā i é kākā'án u. ³² Dā ítúvi ú ñuú Damascú ne, ña odo nūú iña rei, ñá nani Āretá ne, tē tsiñu ña ña é víi kuenta xi'í ñuú san é tñn ña ko é xnuu kutu ñā ko. ³³ Ntá tsi ini xika núu ú, nanúu ñá ko ata ntó'o kán é kánti'u núu diñi ñuú san. Dukuān né, ntíi ní'ni ú nta'a ña.

12

E xé'e Xuva kō é kīnī Pablu

¹ É ínī u tsí ña tuví neé kani'í ko é kāda ka'nu u, ntá tsi xu'ú ne, ká'án ú nee e tá'xi Xuva kō é kūtuní ko, é kīnī u di é vatā ó kuvi te kakéni ko. ² Iní u uun ña'a, ña e kuínti'xe i Cristú ne, é kūvi uxkími kuíā e nádita ña ñā é xee ña é kuvi únī é dukún kán mí tuví Xuva kō. Ntá tsi ña iní u te kanñ kúñu ñā ñe'e ñá ne, o da mii tsí nima ña. Xuva ko iní ña. ³ Iní u tsí ña tsíkán ne, (kuān te kanñ kúñu ña, kuān té nima tsí ña ne, mii tsi Xuva ko iní ña) ne, ⁴ nádita ña

ña mí e dóo vá'ā o mí tuví Xuva kō. Ikān téku ña tú'ūn e dóo xū'ú kaa, e dóo xii kaa, e nté uun ña'a ña kuvi ká'an ña é tēkú tuku ña'a. ⁵ Kuenta iña ñá tsikán ne, kada ka'nu ú, ntá tsi ña kada ká'nu ú kuenta iña míi ko. Da mií tsi kada ka'nu ú kuenta iña i é ña ni kuvi víi u é ña tuví ntíi ko. ⁶ Ntá tsi kuān te ntío ko kada ka'nu ú ne, ñá te vatā ó kaka'an ña tuntu ó kaka'án u, tsí da mií é nuu é ntaā i é kākā'án u. Ntá tsi ña kuān koo víi u vata koo e nté uun ña'a ña kadá kuení ña te dóo ka'nu u. Tsi é ini ña nté kaa u é tēkú ña nté o kaka'án u di. ⁷ É ña ntío Xuva kō é kada ka'nu ú kuenta iña i e tá'xi ña é kūtuní ko é vā'a é iní u ne, tā'xi ña é kānto'o kó, vatā ó kuvi te iñu ni'ni ntído kúnū ko. Vata kaa iña é ña vá'ā san é kanantō'o ko vata koo é ña kuntekú ka é kāde ka'nu u. ⁸ E úni ito ikán u nta'a Tó'o ko te nāki'i ña é kāde i é kānto'o kó san, ⁹ ntá tsi kaka'an ñá nī ko: “Ñá'ā, tsi é xéē ó iña o e dóo kakuinimá ko o. Kutuni ñá'a tsi dóo iō ko é víi u é xntii ú o ntuvi da ña tuví ntíi o”, ka'an ña. Dukuān né, dōo díní ko é kāda ka'nu ú kuenta iña i é ña tuví ntíi ko vata koo é kūtuni ñá'a tsí diví Cristu e dóo iō ñá é víi ña. ¹⁰ Dukuān ne, kaitúvi díní u dá ña tuví ntíi kó, da ntáka'an kíni ña'a san iñá ko di; dá kātaan núu ko, dá ntáde xení ña'a san ní ko, da nēé ka nuu i é kānto'o kó kuenta iñá Cristu. Tsí iní u tsí da ña tuví ntíi kó ne, kidáa kata'xi Xuva ko ntíi ko é víi u.

E dóo kanti'i iní Pablu ña ñu'u ini ukun ñuú Corintu

¹¹ Xu'ú ne, kaka'an ntí'xe ú vatā ó kaka'an úun ña tuntu é kade ka'nu mií ú kuenta iña míi ko. Ntá tsi diví kuētsi nto é kuān ó kaka'án u. Díí ka vá'a o tē dí diví nto ni ká'an ntó kuenta iñá ko. Tsí ña te díí ka dutsí u é vata kaa ña tsikán, pustru e dóo ka'nu ña'a ña, kuiní ña, kuān té ña váda kaidiá'vi ko. ¹² Tsi dóo kutíi ú nima ko dá itúvi ú ni ntō ne, titín nuu i ini nto, nī dóxo ká'nu, vata koo é kūtuni nto tsí nuu é ntaā i é pustrú u iña Xuva ko. ¹³ ¿Mí'i ntū ña ni idé u dadíi ni nto vatā ó de ú nī ña ñu'u ini ukún xio ñuu? Ntá tsi kada ka'nu iní nto nī ko é ña ni natēkú du'xén u nto é xntii ntō kó nee iña é kātaan núu ko.

¹⁴ É iō tu've' ko é kē'ín u, kíkoto ní'ni ú nto é kūvi uni ito. Ntá tsi ñá nateñu nūu ú nto, tsí ña te iña nto e ntío

ko, tsí miī nto é ntio kó nto. Tsí uva i'xá san, ña é dūku ntée é nātsoo vá'a ña iña ña é kūvi iña i'xá ña, ña te i'xá ña é dūku ntée é nātsoo vá'a é kūvi iña ña. ¹⁵ Xu'ú ne, dōo diní ko te nantī'i ú nee iña é iō iñá ko kuenta iña ntó, kuān té nte ntuvi iñá ko nantī'i ú vata koo é ñivi nto nāni'i nto ntuví va'á iña nto. Ntá tsi dā díí díí ka ntio kó nto ne, ñivi ntō né, vata te kantudutsī é ntio nto kó, kuiní ko.

¹⁶ Ini nto tsi nté uun nuu i ña ni nateñu núu ú nto. Ntá tsi iō ña'a ntáka'an ña tsi dóo iní u nté koo vií u é kūvi kani nta'ví u nto. ¹⁷ ¿Vá eni ntā'ví ntu ú nto nta'a ña e táxnūu u mí ntoo nto? ¹⁸ Xu'ú ne, íkān ú nta'a Tító te kī'in ña, kíkoto ní'ni ña nto mí ntoo nto ne, taxnūu ú uun ká tuku ta'an ko é kī'in ñá ni ñā. ¿Vá eni nta'ví ntu Titó san nto? ¿Ñā ntu te dadíí tsi ntáde ntí ni ñā? ¿Ñā ntu te uun tsi nimá nti ni ñā?

¹⁹ Tē ntádē kuení nto tē ntánada'ān ntí kúnū ntí nuu nto, dá kuān ó ntáka'án nti ni ntō. Ntá tsi ña te kuan ō. Tsí nti'í ne, nuu Xúva ko ntáka'án nti e ntántikín nti Cristu. É kuān o ntáka'án nti ni ntō ne, vata koo é xntií ntí nto e díí ka kue'nu nto te kutú've nto iña Xuva ko. Tsí ñivi ntō tá'ān ko e dóo ntio kó nto. ²⁰ Kadē kuení ko nté koo kuvi te nāni'i ta'an ko: tē ña vií nto vatā ó ntio kó, tē ña vií u vatā ó ntio nto ñi. Kadē kuení ko te iō ña é nāa núu ña, te iō ña é kūne'u iní ña, te kūdiin ñá ñi, tē ntio ña é vii mii ñá kuenta iña mii ñá, te ká'an kíni ña iña ta'an ñá, te ká'an véte ña, te káda ka'nu ña, te kuān sá koo vii ña da neé ka é ntio ña. ²¹ Kaū'ví ko tē dá kī'in xtúku ú mí ntoo nto ne, ta'xi Xuva kō é kūka'an nuu xtukú ko kuénta iña ntó, te kutúví nta'xa ú kuenta iña ntó, iō ntó, ña e dóo iō kuetsi i nte dí'na. Váta nātivi iní ña e dóo dé ña nuu i é kíni kaa, e dóo dé ña é kini kaa ni ñadī'í san, é edé ña da neé ka é ntio nima kíni kaa ña.

13

Nté koo vií ña

¹ E sá'a kūvi uni íto é kī'in u, kíkoto ní'ní u nto. Kaka'an tú'un Xuva kō: “Tē xoó ntio i é tsi'i kuetsi uun ká tuku ña'a ne, da miī é kántio uvi, uni ña'a é ntāda ntaá ña”, ka'an. ² É

kāka'án u ni ñā é iō kuetsí i di'na, nī é un ntíí ntíí ña nguú san dá ñe'é u é kuvi ūvi íto ne, kuān te ika túví u mí ntoo nto vevii, ntá tsi kā'án u vata tsī o é kāka'án u dá kixkoto ni'ní u nto é kuvi ūvi íto ne, te kī'ín xtúku u mí ntoo nto ne, ñá ntuntá'ví ini kó ña; da mií é nantō'o ú ña. ³ Kidáa kutūni nto tsí nuu é ntaā i é kāka'án u naá Cristu. Divi ñā ne, ñá te vitá ini ña ni ntō, tsí dóo iō ña é vií ñá ni ntō. ⁴ Ini nto tsí dā xi'i ñá ntiká krusí ne, vata te ña tuvi ntíi ñā, ntá tsi xe'É Xuva ko ntíi ña é ntōto xtuku ña ne, kantíto ña vevii. Ntí'í ne, ña túvi ntíi ntí dī, vata kaa ña é ña tuvi ntíi ña kídaa dá xi'i ña, ntá tsi dā kúdadii ntí ni ñā ne, kata'xi Xúva ko ntíi ntí vata koo é vā'á koo vií ntí kuenta iña nto.

⁵ Kadā kuení mii nto te vā'á o ntákuinti'xe nto. Koto ntee mií nto. ¿Ñā ntu ntákutuni nto te tūví Jesucristu ni ntō, o ñā ntu te nuu é ntaā i é iña ña nto? ⁶ Ntio ko é kūtuni ntó dī tsí ntí'í ne, nuu é ntaā i é ntántikin nti Cristu. ⁷ Ntáka'an ntá'ví nti ni Xuva ko vāta koo é ña vií nto nuu i é kīni kaa. Nā te kuān o ntáde ntí kuenta iña mií nti, vata koo é kā'an ña'a tsi dóo vá'ā o nakua'á nti nto, ntá tsi ntio nti é vā'á koo vií nto, kuān te ña ni idiá'vi ntí, kuiní ña'a san. ⁸ Ña kúvi nakuítá nti nee é nuu é ntaā i. Da mií é vií nti kuenta iña i é nuu é ntaā i. ⁹ Dōo diní nti tē ña kantio é ntí'í koó ntíi ká nti, tsí divi nto kúvi vií nto é un ntí'í. Ntáka'an ntá'ví nti iña nto vata koo é vā'á koo vií kue'en nto. ¹⁰ Taxnúu ú tutú sa'a di'na dá kī'ín u mí ntoo nto vata koo é ña kantío é kāda tii ú ni nto te kī'ín u. Tsí tsiñu e tá'xi Xuva kō é vií u kuenta iña ntó ne, ñá tē é nakō'xó u nto, tsí vií u é ntiíi ú nto é kuē'nu vá'a nto.

¹¹ É nantí'í u é kāka'án u ni nto, tá'an kó ne, ká'an ú ni ntō é vā'a vá'a tsi koo kuntōo nto. Ntuku nto nēe e vá'a ntuvi iña nto. Ka'nu tsi vií nto nima nto. Uun tsi kadā kuení nto ni tā'an nto ne, vá'a tsi koo kuntoo nto ni tā'an nto. Kidáa né, Xuva kō, ña é tā'xi é kuntōo vá'a o, é kuinima tá'an ko ne, kunūu mé'ñu kūnuu dava ña nto. ¹² Kué'le ntō ntiusi tá'an nto. ¹³ Un ntíí ntíí ña ntántikin Xúva ko taxnúu ña ntiusi nto.

¹⁴ Tō'ó ko Jesūcristú na tā'xi ña nto é vā'a. Xuva ko na kuinima ñá nto. Espíritū Sántū sán na kunūu mé'ñu ña

2 CORINTIOS 13:14

23

2 CORINTIOS 13:14

nto ūn ntíí ntīī nto. Kuan tsī koo é kā'án u ni ntō.

Tū'ún xuva kō vatā ó ntáka'an ña ñuú Coatzospan
 New Testament in Mixtec, Coatzospan (MX:miz:Mixtec, Coatzospan)
 copyright © 2003 Wycliffe Bible Translators, Inc.

Language: Mixtec, Coatzospan

Translation by: Wycliffe Bible Translators, Inc.

Copyright Information

© 2003, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixtec, Coatzospan

© 2003, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30
